

Opitarõ Uma Pido laadu pääl

Võro kiil, savvusannakombõ, Vana-Võromaa käsitüü ja -süük – kõgõst seost saat lähkümbält teedä ja ka ütte-tõist oppi laadu pääl tüütärõdõn kellä 10-14.



Ku keelemõistmist puudus jääs vai mõnt sõnna ei tiia, astu võro keele opitarrõ, teemi asja ütenukun selges. A ku kiilt häste mõistat, tulõ proovi, kas saat jaku mõistatusist, tunnõt vahtsit vai essütüs-sõnnu, lasõ-i hinnäst jutuga kotti aija.



Vana-Võromaa savvusanna opitarõn kõnõldas sannakombist ja -väest, opatas sannavihtu tegemist ja jutustadas sanna-lugusid. Võrokõisi suidsusannakombõ omma UNESCO üleilma tähtsä kultuuriperändüse esindüsnamekirän.



Hää ja õigõ **Vana-Võromaa süük** om iks esi tettü ja muidoki kohaligust kraamist. Üts opitarõ om sõira-tarkuisi pääle ja tõsen saa teedä, määndse omma Võromaa kasvosõogi ja kuimuudu mõtsikist kasvõst süvvä võinu tetä.



Vana-Võromaa käsitüü opitarõdõn saa kätt pruuvi puutüü asjan ja langast näputüü tegemisen. Edevä Eremiidi ja timä käealotsidõ man tetäs puust kausse, luitsid ni muid ütenu anomit. Opatas ka tohust asju tegemist. Naasõ oppasõ vokiga keträma, kaplu-nüüre pletma ja viil muud näputüüd.

Tark võtt ulli käest ka oppust, a ull ei võta targa oppust!

Tüütärõdõ kotsilõ teedüs Külli Eichenbaum, tel 56611924, kylli.eichenbaum@gmail.com